

# INUIT ATAQATIGIIT

## Inatsisartuni



UKA 2018/162  
29.10.18.  
Peter Olsen

**Kalaallit Qallunaat Nunaanni ilinniagaqartut ineqarnikkut amerlanernik periarfissinneqarnissaannut Naalakkersuisut pisariaqartitsinermik inissanillu amerlanernik pissarsisinnaanermik misissuinissamik peqquneqarnissaannut Inatsisartuni aalajangiiffigisassatut siunnersuut.**

(Inatsisartunut ilaasortaq Mimi Karlsen, Inuit Ataqatigiit)

Inuit Ataqatigiit anguniagaattut, nunami maani, innuttaasut amerlanerpaartaasa namminiilivinnissaminnik kissaateqartut akornanni nunaqartuulluni, aatsaat taamak pingaartigilerpoq kikkut tamarmik pisariaqartinneqartut, atorfissaqartinneqartutullu misigisimalernissaannik qaammarsaanissaq.

Kinanguugaluarutta kinarsuugaluaruttaluunniit, allagartaqarutta allagartaqanngikkaluaruttaluunniit, nunatta tamatta atorfissaqartippaativut; assaat tamarmik atorfissaqartinneqarlutillu pisariaqartinneqarput.

Minnerusoqaranilu annerusoqanngilaq.

Nunattali siunissami qaamanerumik atugassaqalernissaata tungaanut ingerlaniarnitsinni aporfissanik, unammilligassarpassuarnillu ulikkaarpugut. Unammilligassatta ilagiinnarpaat; Ilinniarsimannngissuseq suliffissaaleqinerlu.

Ullumikkullu ilisimasavut imaapput; ilinniartitsisussaaleqisoqarpoq, meeqqerisussaaleqineqarpoq, nakorsassaaleqivugut, kigutilerisussaaleqivugut, uagutsitut oqalussinnaasunik allaffissuarni sumi tamaani pisortassaaleqivugut, allaat aalisarnerup silarsuaani aasaanerani ulapaarfiuleruttorfiup nalaani sulisussaaleqinerujussuaq takkuttarpoq, allaat nunatta avataaniit tikisitsisariaqalertarsimalluta.

Imaappoq naatsumik oqaatigissagaanni, suliffissaaleqineq imaangilaq suliffissaqannginnermik tunngaveqartoq, imaappoq suliffissaqaraluarpoq, suliffissaaleqinerli annerpaamik tunngaveqarpoq ilinniarsimannngissusermik.

Ullumikkut ilisimasavut imaapput; suliffissaaleqisut akornannit 45 %-i inuusuttuupput 18-niit 34-it tungaanut ukioqartuusut. Taakkunanga tamangajalluinnarmik ilinniarsimasuunngillat, amerlanerpaallu meeqqat atuarfiannilluunniit nammassinikuusimanatik.

Taamaattumik ilinniarsimassutsip tungaatigut nunatsinni annertuumik unammilligassaqarpugut, suliassaqarpugut nukittorsagassaqarlutalu; nunatta iluani ilinniartitaaneruppat, nunattaluunniit avataani ilinniartitaaneruppat.

# INUIT ATAQATIGIIT

## Inatsisartuni



Ilinniartuutitta, ilinniartuunermi nalaanni pitsaanerpaanik atugassaqaarnissaat Naalakkersuinikkut suliaqartuusugut kikkuugaluaruttaluunniit tamatta sukut tamatigut pingaartillugulu anguniartuagassatta ilagilluinnartariaqarpaat.

Nunatta avataani ilinniartuutitta pitsaasunik atugassaqaarnissaqalernissaat aqutissiuusseqataaffigisariaqarparput.

Minnerunngitsumik qallunaat nunaanni ilinniartuutitta, isertakitsunillu angajoqqaallit, nammineerlutik akiliillutik initaarsinnaanngitsut, toqqissisimanartumik, namminerlu akileeqqaanngikkaluarlutik initaarsinnaanissaat aqutissiuussinnaasariaqarparput.

Taamaattumik annerusumik oqaaseqarfigeqqinnagu, Inuit Ataqatigiiniit taamatut oqaaseqarluta, inatsisartunut ilaasortap Mimi Karlsenip Inuit Ataqatigiinneersup siunnersuutaa taperserlugu ataatsimiisitaliamut susassaqaartumut suliaassanngorlugu ingerlateqqipparput.

Qujanaq